

**BOSNA I HERCEGOVINA
FEDERACIJA BOSNE I HERCEGOVINE
VLADA**

PRIJEDLOG

ZAKON

O IZMJENI KRIVIČNOG ZAKONA FEDERACIJE BOSNE I HERCEGOVINE

Sarajevo, januar 2014. godine

PRIJEDLOG ZA DONOŠENJE ZAKONA PO SKRAĆENOM POSTUPKU

Predlažemo, po skraćenom postupku, donošenje Zakona o izmjeni Krivičnog zakona Federacije Bosne i Hercegovine. Kao osnovni razlog ističemo da se u konkretnom slučaju ne radi o složenom i obimnom zakonu te da su u tom smislu ispunjeni uvjeti iz člana 172. Poslovnika Predstavničkog doma Parlamenta Federacije Bosne i Hercegovine ("Službene novine Federacije BiH", br. 69/07 i 2/08) i člana 164. Poslovnika o radu Doma naroda Parlamenta Federacije Bosne i Hercegovine ("Službene novine Federacije BiH" br. 27/03 i 21/09).

Z A K O N
O IZMJENI KRIVIČNOG ZAKONA FEDERACIJE BOSNE I HERCEGOVINE

Član 1.

U Krivičnom zakonu Federacije Bosne i Hercegovine ("Službene novine Federacije BiH", br. 36/03, 37/03, 21/04, 69/04, 18/05, 42/10 i 42/11) u članu 43a. stav 1. riječ „može“ zamijenjuje se riječju „će“.

Član 2.

Ovaj zakon stupa na snagu osmog dana od dana objave u "Službenim novinama Federacije BiH".

O B R A Z L O Ž E N J E

ZAKONA O IZMJENI KRIVIČNOG ZAKONA FEDERACIJE BOSNE I HERCEGOVINE

I – USTAVNI OSNOV

Ustavnopravni osnov za donošenje ovog zakona sadržan je u odredbi člana IV.A.20. (1) d) Ustava Federacije Bosne i Hercegovine, kojim je propisano, da je Parlament Federacije Bosne i Hercegovine nadležan za donošenje Zakona o vršenju funkcije federalne vlasti.

Ustavnopravni osnov za donošenje ovog zakona je utvrđen prilikom njegovog prvog usvajanja i ovaj zakon je do sada više puta mijenjan.

II – RAZLOZI ZA DONOŠENJE ZAKONA

Osnovni razlog za donošenje ovog zakona jeste dosljedno provođenje Odluke Ustavnog suda Bosne i Hercegovine broj: AP 2809/12 od 24.05.2013. godine, a koji se odnosi na odgovarajuće izmjene Krivičnog zakona u dijelu koji se odnosi na odredbu člana 43a. Krivičnog zakona Federacije Bosne i Hercegovine radi usklađivanja ove zakonske odredbe sa Ustavom Bosne i Hercegovine i Evropskom konvencijom za zaštitu ljudskih prava i osnovnih sloboda, a zbog proizvoljne primjene i tumačenja navedene odredbe Krivičnog zakona Federacije BiH.

III – OBRAZLOŽENJE POJEDINIHZAKONSKIH RJEŠENJA

Odlukom Ustavnog suda Bosne i Hercegovine u predmetu AP 2809/12 od 24.05.2013. godine je usvojena Apelacija apelanta M.T. te je utvrđena povreda njegovog prava na pravično suđenje iz člana II/3-e) Ustava Bosne i Hercegovine i člana 6. stav 1. Evropske konvencije za zaštitu ljudskih prava i osnovnih sloboda.

Ustavni sud BiH je u predmetnoj odluci detektirao kao spornu odredbu člana 43a. Krivičnog zakona Federacije BiH kojom je predviđeno da se izrečena kazna zatvora u trajanju do jedne godine može na zahtjev osuđenika zamijeniti novčanom kaznom. Zamjena kazne zatvora novčanom kaznom je ovom zakonskom odredbom predviđena samo kao mogućnost, tako da je sudu dato diskreciono pravo u pogledu ove norme, a ne obaveza. Iz tog razloga Ustavni sud BiH smatra da primjena odredbe člana 43a. Krivičnog zakona Federacije BiH dovodi do pravne nesigurnosti osuđenika koji ispunjavaju propisane uvjete u ostvarivanju zakonom predviđenog prava. Pored toga, Ustavni sud BiH smatra spornim sa aspekta pravne sigurnosti da o zahtjevu osuđenog za zamjenu kazne zatvora novčanom kaznom odlučuje isti sud koji je vodio krivični postupak i izrekao kazneno-pravnu sankciju, odnosno sud koji je prilikom izricanja kazne zatvora vodio računa o svim relevantnim okolnostima koje se odnose na individualizaciju i svrhu kazne, a koje okolnosti sud razmatrajući zahtjev osuđenog ponovno ocjenjuje.

U skladu sa navedenim, izvršena je potrebna intervencija na odredbi člana 43a. stav 1. Krivičnog zakona Federacije BiH na način da se riječ „može“ zamijenjuje riječju „će“. Navedenom intervencijom definiše se obaveza suda u navedenoj pravnoj situaciji na način da će sud zamijeniti kaznu zatvora novčanom u slučaju da je osuđenoj osobi izrečena kazna zatvora do jedne godine. Razmatrajući odluku Ustavnog suda Bosne i Hercegovine, predlagač je mišljenja da je pitanje utvrđivanja društvene opasnosti djela kao individualizacije kazne u smislu ocjene svih relevantnih okolnosti već provedena prilikom izricanja kazne zatvora do jedne godine, te da u tom smislu kao dosljedno provođenje navedene odluke Ustavnog suda BiH smatra definisanje osnovnog uvjeta za zamjenu kazne zatvora novčanom kaznom, a to je da se u konkretnom slučaju radi o izrečenoj kazni zatvora do jedne godine.

IV – FINANSIJSKA SREDSTVA

Za sprovođenje ovog zakona nije potrebno osigurati dodatna finansijska sredstva u Budžetu Federacije BiH.

ODREDBA ZAKONA KOJA SE MIJENJA

Član 43a.

Zamjena kazne zatvora

(1) Izrečena kazna zatvora u trajanju do jedne godine može se, na zahtjev osuđenika, zamijeniti novčanom kaznom koja se plaća u jednokratnom iznosu u roku do 30 dana.

(2) Kazna zatvora zamjenjuje se novčanom kaznom tako što se svaki dan izrečene kazne zatvora izjednačuje s jednim dnevnim iznosom novčane kazne ili sa 100 KM ako se novčana kazna utvrđuje u određenom iznosu.

(3) Ako se novčana kazna ne plati u roku iz stava (1) ovoga člana, sud će donijeti odluku o izvršenju kazne zatvora. Ako se novčana kazna plati samo djelimično, izvršit će se kazna zatvora srazmjerno iznosu koji nije plaćen.